

Шавкат Мирзиёев Ўзбекистон Либерал-демократик партияси съездидаги иштирок этди



Президент Шавкат Мирзиёев 9 сентябрь куни Тадбиркорлар ва ишбилармонлар ҳаракати - Ўзбекистон Либерал-демократик партиясининг X съездидаги иштирок этди.

Унда шу йил 24 октябрь куни бўлиб ўтадиган Ўзбекистон Республикаси Президенти сайловида қатнашиш учун партиядан номзод кўрсатиш масаласи муҳокама қилинди.

Анжуман қатнашчилари бу сайлов муҳим сиёсий воқеа экани, Президентликка кенг билим ва катта тажрибага эга, азму шиҷоатли ва қатъиятли, етакчи шахс номзодини илгари суриш зарурлигини қайд этди.

Партия электорати фикрларини инобатга олган ҳолда, Тадбиркорлар ва ишбилармонлар ҳаракати - Ўзбекистон Либерал-демократик партиясининг Съездидаги Ўзбекистон Республикаси Президентлигига бутун фаолиятини халқимиз фаровонлигига бағишилаб келаётган, бугунги мураккаб даврда мамлакатимизни ривожлантиришга қодир бўлган, ўзининг инсоний фазилатлари ва раҳбарлик қобилияти билан юртдошларимиз ҳурмати ва меҳрини қозонган Шавкат Миромонович Мирзиёев номзодини кўрсатиш тўғрисида қарор қабул қилди.

Ўзбекистон Республикаси Президенти лавозимига номзод Шавкат Мирзиёев ўз сайловолди дастурининг асосий йўналишлари ҳақида маъруза қилди.

Сўзга чиққанлар номзоднинг кўп йиллик раҳбарлик тажрибасига эга экани, мамлакатимизни ривожлантириш ва халқимиз фаровонлигини ошириш йўлида улкан хизматлар қилганини таъкидлашди.

Охирги беш йилда Шавкат Мирзиёевнинг ташабbusи ва саъи-ҳаракатлари билан тарихий аҳамиятга эга маъмурий, ҳуқуқий ва иқтисодий ислоҳотлар амалга оширилди. Халқ ҳокимияти

мустаҳкамланиб, давлат органларининг ҳисобдорлиги таъминланди.

Шу даврда мамлакатимиз иқтисодиёти 24 фоизга, саноат 34 фоиз, экспорт ҳажми 1,5 баробарга, хорижий инвестициялар ҳажми эса 3 баробарга ошди. Ялпи ички маҳсулотимиз 60 миллиард долларга етди. Ўртacha ойлик иш ҳақи 2,2 марта кўпайди.

Партия электоратининг салмоқли қисми бўлган тадбиркорлар ва ишбилармонлар учун янада кенг имкониятлар яратилди. Худудларни ривожлантириш, саноат ва хизматлар кўламини кенгайтириш чоралари кўрилди.

Буларнинг барчаси, пировард натижада, юз минглаб янги иш ўринлари яратилиши, халқимиз фаровонлиги ошишига хизмат қилаётгани таъкидланди.

Инсон манфаати ислоҳотларнинг бош мақсадига айланди. Ижтимоий йўналтирилган дастурлар амалга оширилди. Илм-фан, таълим-тарбия, соғлиқни сақлаш, маданият ва санъат, оммавий ахборот воситалари, спорт соҳаларини ривожлантиришга ҳам катта эътибор қаратилгани қайд этилди.

Бундай янгиланиш ва ривожланишни муваффақиятли давом эттириш учун Шавкат Мирзиёевни Ўзбекистон Республикаси Президенти этиб сайлаш энг тўғри йўл эканлиги тўғрисида яқдил фикр билдирилди.

Съездда кўриб чиқилган масалалар юзасидан тегишли қарорлар қабул қилинди.





Özbekiston Respublikasi Prezidentining
MATBUOT XIZMATI



Özbekiston Respublikasi Prezidentining
MATBUOT XIZMATI



[Манба](#)